

Inilalathala ng Partido Komunista ng Pilipinas-Bagong Hukbong Bayan sa Rehiyong Bikol

REBOLUSYONARYONG
PANGMASANG
PAHAYAGAN
NG BIKOL

Taon XXV Blg.1
Enero-Marso 2002

EDITORIAL

Patalsikin si Macapagal-Arroyo! Paigtingin ang Armadong Pakikibaka!



Labis ang pagkasuklam ng mamamayan sa tahasang pagkapapet, korapsyon at panunupil ng rehimeng US-Macapagal-Arroyo.

Dadaluyong ang makapangyarihang pwersa ng lumalabang mamamayan habang tumitindi ang nararanasan nitong kahirapan at kaapihan. Bitbit ang mga kaldero at kawaling walang laman, kakalampagin ang rehimen ng nakakabinging protesta ng bayan. Sa mga darating na buwan, tiyak na haharapin ng rehimen ang papalaking mga protesta sa mga lansangan at ang pag-igting ng armadong paglaban.

Sundan sa pahina 2

Inilalathala minsan bawat ikatlong buwan ng Partido Komunista ng Pilipinas-Bagong Hukbong Bayan ng Rehiyong Bikol

Nilalaman

Enero-Marso 2002

Editorial: Patalsikin
si Macapagal-Arroyo!
Paigtingin ang
armadong pakikibaka! p. 1

Ilang malalaking
kaso ng korapsyon p. 4

Pananalasa at
Pandarambong:
Pagsaklot ng
Imperyalismo p. 5

Agresyong US p. 7

Paglabag sa
Prinsipyo ng Usapang
Pangkapayapaan p. 9

Sigwa ng
Unang Kwarto p. 11

Sa Ika-33
Anibersaryo ng
BHB p. 13

Kampanya sa
Pagpapataas ng
Presyo ng Kopra
at Pag-alis ng Resikada p. 15

SILYABALITA p. 17

**Diwang
Rebolusyonaryo** p. 20


**Rebolusyonaryong
Awit** p. 22

Batoy p. 22

Walang kahihyang ipinangangalandakan ni Gloria Macapagal-Arroyo ang papuri ng kanyang imperyalistang amo sa kanyang tahasang pagpapakapapet. Idineklara niya ang sarili bilang tagapamandila ng "laban sa terorismo sa Asya", ayon sa "doktrinang Bush".

Bilang premyo sa rehimen, muling binanggit ni Bush sa kanyang talumpati noong Marso 11 ang pangakong karagdagang \$19M na pondo, mga kagamitan at pwersa para sa modernisasyon ng AFP. Walang ibang target ang agresyong US kundi ang lumalakas at lumalawak na rebolusyonaryong kilusan, na pinaparatangang "terorista". Hudyat ito ng pagtindi ng kontra-rebolusyonaryong digma.

Walang katulad sa nakaraan ang kagarapalan ni Macapagal-Arroyo sa kanyang pagkakandarapang isuko ang pambansang soberanya at kalayaan ng bansa. Naging bingi at brusko si Macapagal-Arroyo sa pagpapatanggap ng armadong agresyon ng US sa bansa, na ikinukubli bilang mga "pagsasanay militar". At kanyang isinantabi maging ang mga ligal na hadlang sa panunumbalik ng mga armadong tropa ng US sa bansa. Ginagamit na ng US bilang isang malaking base militar ang buong Pilipinas.



Ibinasura na ng sambayanan ang kasunduan sa base militar. Napatalsik ang mga base militar ng dambuhalang mga protesta ng mga militante at makabayang pwersa noong 1991. Sa kasalukuyan, ang pagsigla ng mga protesta ay mahusay

na kundisyon para sa mas malawakan at malalimang paglilina sa mamamayan ng patuloy na dominasyon ng US sa pulitika, ekonomya, kultura at relasyong panlabas.

Kundenahin ang Karahasan at Kalupitan ng Estado

Buong kalupitang hinahagupit ang kabuhayan at kagalingan ng mamamayan ng patakarang globalisasyon ng "malayang pamilihan". Todong pahirap at pagsasamantala ang nararanasan ng masang magsasaka at manggagawa sa ilalim ng rehimen ng Macapagal-Arroyo. Lantaran nitong itinataguyod ang interes ng malaking burgesya-kumprador-panginoong maylupa.

Patuloy ang pagtaas ng presyo ng langis, mga pangunahing bilihin, pati singil sa tubig at kuryente, sa

Sundan sa pahina 3

pamamagitan ng Purchased Power Adjustment (PPA). Hindi na kayang bilhin ng mamamayan ang kanyang mga batayang pangangailangan. Dumaraing maging ang hanay ng petiburgesyang

lunsod at panggitnang burgesya. Sa harap ng lalong lumalalang krisis, mas matinding kahirapan at paghihikahos ang nararanasan ng sambayanan.

Bulgarang iniinsulto ni Macapagal-Arroyo ang lahat ng pagtutol at protesta ng mamamayan sa labis na kahirapan at karahasan ng estado. Kasabay nito, sistematiko ang kampanya sa pampulitikang panunupil sa mga progresibong pwersa, sa layuning takutin ang mamamayang magpahayag ng pagtutol sa kasalukuyang sistema.

Sagad-sarang nagpapakana ng mga pang-iintriga at paninira ang Sentral na Ahensyang Paniktik ng US (CIA) at reaksyunaryong Sandatahang Lakas ng Pilipinas (AFP) upang siraan ang Partido Komunista ng Pilipinas (PKP), Bagong Hukbong Bayan (BHB) at Pambansa Demokratikong Prente ng Pilipinas (NDFP), at Moro Islamic Liberation Front (MILF). Sangkalan ito upang direkta nang mapokusang ng armadong agresyon ng US ang rebolusyonaryong kilusan. Todo-todo na ang militarisasyon sa mga kanayunan.

Walang pakundangan ang mga paglabag sa mga karapatang pantao at internasyunal na makataong batas sa mga kanayunan, at maging sa kalunsuran. Ang mga biktima ng abusong militar ay awtomatikong idineklarang "terorista" ng pasistang AFP-PNP.

At hinubad na ng rehimen ang natitira pa nitong maskara ng pagpapanggap na

maka-kapayapaan. Pinapabwelo na ni Macapagal-Arroyo ang prinsipal na mga militarista sa rehimen na lantarang nagmamaniobra para masabotahe ang usapang pangkapayapaan sa pagitan ng GRP at NDFP, at ng GRP at MILF.



Itakwil ang korapsyon

Nagiging mas lantaran ang korapsyon at katiwalian ng nahaharing pangkating Macapagal-Arroyo. Lumalaki ang bitak sa hanay nila sa pag-aagawan ng kurakot sa gubyerno. Tumitindi ang bangayan at hidwaan sa hanay ng mga reaksyunaryo at mabilis na nalalantad ang mga katiwalian. Bulgaran na ring nakikipag-areglo si Macapagal-Arroyo sa mga Cojuangco sa desperadong pag-iipon ng pondo para sa eleksiyong 2004. Sangkot sa malalaking kaso ng korapsyon mismo ang kanyang asawa, mga kamag-anak at malalapit na kaibigan. (*tingnan ang lista ng mga kaso ng korapsyon*)

Sa loob ng mga darating na buwan, puspusang malalantad ang reaksyunaryong gubyerno at mahihikayat ang mas malawak na mamamayan sa paglaban.

Sa harap ng papatinding pang-aapi at pagsasamantala, kailangang puspusang pukawin, organisahin at pakilusin sng mamamayan upang maitaguyod ang kanilang karapatan at kagalingan. Napakapaborable ng sitwasyon upang mapalahok ang pinakamalawak na hanay ng mamamayan sa pagrerebolusyon.

Patalsikin si Macapagal-Arroyo sa Malakanyang bago pa ang eleksiyong 2004!

Paigtingin ang armadong pakikibaka upang maihiwalay sa masa ang naghaharing rehimen at mapahina ang reaksyunaryong estado at sistema!

Ilang malalaking kaso ng korapsyon sa ilalim ng rehimeng Macapagal-Arroyo

halaw mula sa: *ANG BAYAN*, Marso 2002

- P1.4 bilyong tinabo ng CODE-NGO, isang NGO na pinamumunuan ng mga nasa gabinete ni Macapagal-Arroyo at mga sosyal-demokrata na malalapit sa kanya. Maanomalyang binigyan ito ng solong prangkisa at malaking komisyon sa pagbebenta ng P10 bilyong PEACE *bonds* (bono). Laway at mahigpit na kuneksyon lamang sa Malakanyang at Kagawaran sa Pananalapi ang naging tanging puhunan ng CODE-NGO para masolo ang PEACE *bonds* at malaking kita mula rito.
- Pakikialam ni Mike Arroyo, asawa ng presidente, sa mga pondo ng *Philippine Amusement and Gaming Corporation* (PAGCOR) at *Philippine Charity Sweepstakes Office* (PCSO) at paggamit ng milyun-milyon mula sa mga ito para tustusan ang gastos sa eleksyon noong Mayo 2001.
- Pag-apruba sa kontrata ng *Industrias Metalurgicas Pescarmona SA* (IMPSA), isang kumpanyang Argentinian, para sa rehabilitasyon ng planta ng kuryente sa Caliraya-Botocan-Kalayaan, limang araw lamang pagkaluklok ng bagong gubyrno. May mga akusasyong kumita nang malaki ang Kalihim ng Department of Justice na si Hernando Perez at si Macapagal-Arroyo mismo sa aregluhan para rito.
- Paghingi ng kalahati ng sapi ng *Philippine Communications Clearinghouse Inc.* (PCCI) mula sa may-ari nitong si Pacifico Marcelo, kapalit ng pagbawi ng pagdis-apruba (*veto*) ni Macapagal-Arroyo sa prangkisa upang mamonopolisa ng PCCI ang pangangasiwa sa inter-kuneksyon ng lahat ng mga kumpanya sa telekomunikasyon, na tinatayang nagkakahalaga ng mahigit P53 bilyon taun-taon. Naganap ito noong lihim na ipinatawag ni Macapagal-Arroyo si Marcelo sa Malakanyang. Hindi pumayag si Marcelo kaya itinuloy ang pagsasampa ng mga kaso laban sa kanya. Ayon sa pangangatwiran ni Macapagal-Arroyo, ang hiningi niya ay hindi para sa sarili, kundi “para sa gubyrno”.
- Pakikipag-areglo kay Danding Cojuangco kaugnay ng pondong *coco levy*, mga sapi at kontrol ng gubyrno sa *San Miguel Corporation* (SMC) at iba pang pinuhunan mula sa naturang pondo, kapalit ng pampulitikang suporta at malaking pinansyal na kontribusyon ni Cojuangco para sa kampanya ni Macapagal-Arroyo sa eleksyong 2004.
- Di pagpapatuloy ng kaso ng gubyrno laban sa paglusot ni Lucio Tan sa dapat na binayaranang buwis, kapalit ang pagbaling ni Tan ng suporta mula kay Estrada tungo kay Macapagal-Arroyo.
- Pagiging tagapamagitan ni George Baviera, isang taong malapit kay Macapagal-Arroyo at Tagapagsalita ng Pangulo Rigoberto Tiglao, sa mga negosasyon sa pagbabayad ng ransom ng mga *hostage* ng Abu Sayyaf.
- Pagtanggap ng mga senador at kongresman maging sa kampo ni Macapagal-Arroyo ng suhol mula sa mga Estrada, kapalit ng pag-endorso nila ng kahilingan ng nakakulong na dating presidente para mapayagang pumunta sa US upang diumano magpagamot ng tuhod.
- Paghawak ngayon ng Malakanyang sa aktibong nagpapatuloy na operasyon ng jueteng sa pamamagitan ng mga *jueteng lord* at mga pinuno ng AFP at PNP na malalapit kay Macapagal-Arroyo.

S

PANANALASA AT PANDARAMBONG: PAGSAKLOT NG IMPERYALISMONG US



Sa bawat digmang agresyon at interbensyong militar na inilulunsad ng imperyalismong US, pang-ekonomyang kapakinabangan at pampulitikang kontrol ang kahulugan nito para sa malalaking monopolyo-burgesyang Amerikano sa kapinsalaan ng mga dinadahas nitong mamamayan.

Noong ika-19 na siglo lumakas at tuluy-tuloy na lumaki ang produksyon ng industriya sa US at nagsanib ang pampinansya at industriyal na puhunan hanggang marating nito ang imperyalistang yugto ng kapitalismo. Sa panahong ito rin nagsimula ang pananalakay at pag-agaw ng imperyalismong US sa mga dating kolonya ng Espanya upang maging bagsakan ng kanyang mga labis na produkto at mapagkukunan ng mga hilaw na materyales.

Nagsimula na rin ang imperyalismong US na magtayo ng kanyang mga base militar sa Puerto Rico at Cuba upang protektahan ang kanyang mga negosyo at iba pang pang-ekonomyang interes. Sa Pilipinas, pagkatapos na ng Ikalawang Digmaang Pandaigdig itinayo ang mga base militar ng US. Matapos ang tuwirang pangongolonya sa mahigit apat na dekada, mga tropang militar na ng

imperyalismong US ang nanghimasok at nang-agaw sa tagumpay ng rebolusyong Pilipino laban sa Espanya at tuluyang sumalakay at sumakop sa Pilipinas.

Gera Para Sa Imperyalistang Interes

Ang paglawak ng impluwensyang pang-ekonomya ng US ay nagluwal ng pandaigdigang presensyang militar nito magmula sa Europa papuntang Aprika hanggang Pasipiko at Asya.

Sa panahon ng tunggalian ng rebisyunistang Unyong Sobyet at ng imperyalismong US sa pagdodomina sa daigdig (1956-1991), naging estratehiya ng US ang pagmamantini ng mga base militar at mga barkong pandigma sa iba't ibang panig ng mundo upang magsilbing banta sa kanyang karibal at kung kinakailangan, mas madali ang pagpakat ng mga tropa nito sa pagpoprotekta ng mga negosyong Amerikano at ng kanyang mga alyado.

Noong dekada 80, ipinakat ng US ang 40 barkong pandigma sa Persian Gulf upang protektahan ang interes ng mga pyudal na naghahari sa Gitnang Silangang Asya dahil kasosyo ang mga ito ng mga korporasyong Amerikano sa langis. Ginamit nitong rason ang Digmang Iran-Iraq upang pumapel bilang "pandaigdigang pulis" ngunit sa katotohanan, sinuportahan nito ang Iraq laban sa anti-imperyalistang kilusang Muslim ng Iran.

Sa mga taon ding ito

Sundan sa pahina 6

PANANALASA AT PANDARAMBONG:

dinagdagan ang pondo ng mga base militar ng US sa Pilipinas upang magsilbing lunsaran ng pwersa sa mabilisang pagpakat (*rapid deployment force*) ng imperyalismong US na susuporta sa Middle East.

Dinigma rin nito ang Iraq noong dekada 90 upang protektahan ang interes sa langis ng mga naghaharing-uri sa Saudi at Kuwait na mga kliyente ng imperyalismong US. Pagprotekta rin sa interes nito sa suplay ng langis sa Gitnang Asya ang dahilan, nang salakayin nito ang Afghanistan noong nakaraang taon.

Sa pagbagsak ng rebisyunistang Unyong Sobyet, hindi na paborable sa US na magmantini ng mga base militar sa iba't ibang bahagi ng mundo. Ang imperyalistang US ang natirang tanging superpower sapagkat nagkawatak-watak ang Unyong Sobyet at nalugmok ang ekonomya nito sa antas ng mga nasa Ikatlong Daigdig. Dagdag pa, kinakaharap ng US ang malaking depisit sa badyet at kalakal, at lumulobong utang panlabas. Mas pinagtutuunan nito ang pagbubuo ng mga kasunduan sa malayang pagpasok at paggamit ng mga rekurso ng mga bansang paglulunsaran ng mga *war games* (tulad ng Balikatan dito sa Pilipinas) na hindi kasing-gastos kumpara sa pagmamantini ng base militar. Bukod pa rito, bahagi ng gastusin para sa *war games* at pangangailangang lohistika ng tropang Amerikano ay sasaluhin ng bansang paglulunsaran mula sa sarili nitong pampublikong pondo.

Dito sa Pilipinas, nanunumbalik ang armadong agresyon ng imperyalismong US sa mamamayang Pilipino sa pamamagitan ng mga mapanlinlang at antinasyunalistang Visiting Forces Agreement (VFA) at Mutual Logistics and Support Agreement (MLSA) na nagluluwal ng mararahas na Balikatan 02-1 at ng pinag-uusapang Balikatan 02-2. Pursigidong isinusulong ito ng imperyalismong US at ng tuta nitong rehimeng Macapagal-Arroyo dahil mahigpit

ang pangangailangan ng US sa estratehikong lokasyon ng Pilipinas, lalupa't umiigting ang diwang nasyunalismo sa Ikatlong Daigdig. Tinitingnan nito na ang mga anti-imperyalistang kilusan sa Middle East at sa Hilagang Korea, at ang panunumbalik ng kapitalismo sa higanteng ekonomya ng Tsina bilang mga banta sa kanyang pang-ekonomyang interes. Maliban pa rito, matagal nang ninanais ng imperyalismong US na muling makaposisyon ang kanyang tropang militar sa tinatawag nitong Lugar ng Kaunlaran sa Timog Silangang Asya o Brunei, Indonesia, Malaysia, Philippines-South East Asian Growth Area (BIMP-SEAGA) upang mas humigpit pa ang kontrol nito sa tinukoy na lugar.

Dagdag pa, alam ng imperyalismong US na may malakas na anti-imperyalistang rebolusyonaryong kilusan dito sa Pilipinas na matagal na niyang pinagsisikapang durugin sa pamamagitan ng mga papet nitong tropang AFP. Nangangamba ang imperyalistang US sa banta ng malalaking pagsulong ng rebolusyonaryong kilusan matapos ang ikalawang dakilang kilusang pagwawasto.

Gera Para Sa Pambansang Kalayaan

Hinaharap ngayon ng mamamayang Pilipino ang banta ng digmang agresyon mula sa imperyalismong US. Nararapat lamang na maging handa ang bawat Pilipino na labanan ang presensyang militar ng imperyalismong US upang patuloy na ipaglaban ang dignidad at soberanya ng bansang Pilipinas. Kailangan ding maging handa ang buong rebolusyonaryong kilusan upang ipagtanggol ang kapakanan ng bayang Pilipino mula sa dayuhang bantang ito. Kailangang maging handa, laluna ang Bagong Hukbong Bayan, sa isang digma ng pambansang pagpapalaya upang tuluyang wakasan ang mapaniil na pagkakasaklot ng imperyalismong US sa bansang Pilipinas.

S


AGRESYONG US: PAGPAPATULOY NG WALANG-KAHIHIYANG PAGKAPAPET NG REHIMENG US-MACAPAGAL-ARROYO

Hindi pa nasasapatan ang imperyalismong US sa 660'ng tropa nitong naka-istasyon ngayon sa katimugang bahagi ng Mindanaw. Hindi pa nga natatapos ang "Balikatan 02-1" at ni hindi pa naisasakatuparan ang panabing na "misyong" nitong "iligtas ang mga bihag at durugin ang bandidong Abu Sayyaf," heto at garapalang ipinagtutulakan na kaagad ng reaksiyong gobyerno ng Pilipinas at US ang "Balikatan 02-2."

Ang naturang "pagsasanay militar" ay balak na ilunsad sa Gitnang Luzon mula Abril 22 hanggang Mayo 5. Nakatakdang lahanan ito ng 2,665 na tropang Amerikano at ibubukas ito sa mga armadong hukbo ng sampu pang bansa "bilang mga tagamasid lamang." Bahagi ito ng "Team Challenge," ang pagsasanay-militar na inilulunsad ng US upang ihanda ang iba't ibang hukbo sa Asya sa direktang paglahok sa armadong interbensyon ng US sa iba't ibang bansa.

Balak magdala ang mga tropang Amerikano ng 17 iba-ibang klaseng helikopter, apat na FA-18 Hornet *fighter jet*, siyam na eroplanong C-130, dalawang tangkeng KC-130 at isang barkong panlohistika, ang USS Fort McHenry.

Batay sa mga aroganteng pahayag ng militaristang heneral na si Angelo Reyes, ikinakahong target na ng "pagsasanay-militar" na ito ang mamamayang Pilipino at ang rebolusyonaryong kilusan.



ANG PANDAIGDIGANG AGRESYONG MILITAR NG US

Ang hakbanging ito ng imperyalismong US ay bahagi ng kanilang engrandeng estratehiyang pasulong na depensa (Forward Defense Strategy) na inilunsad matapos ang Ikalawang Digmaang Pandaigdig. Nagbibigay ito sa kanila ng maayos at mabilis na daluyan ng mga tropang sinanay na manghimasok sa mga bansa sa ikatlong daigdig.

Layunin nitong ipakita at igiit ang kanilang imperyalistang superyoridad, at ikahon ang mga binabalak nitong digmaan sa labas ng teritoryo ng US. Layunin din nitong kamtin ang kakayahang makauna sa atakeng nukleyar (*nuclear first strike capability*) laban sa mga bansang may kakayahang makidigmang nukleyar.

Kabilang sa disenyo nito ang malawakang pagpakat ng mga malalaking pandigmang-sasakyang pandagat na siyang nagdadala ng mga pangmalapitang missile (*short ranged missiles*) na may bombang nukleyar (*nuclear warhead*), at paglulunsad ng mga pagsasanay-militar sa mga bansang mayroong minamantining base militar ang US, o kaya'y may malaking potensyal bilang isang mahusay na lunsaran ng mga tropa at kagamitang pandigma.

Sa kasalukuyan, natatabingan ang imbing planong ito ng maskarang "Operation

Sundan sa pahina 8

AGRESYONG U.S.

Enduring Freedom” na kunwaring lumalaban sa terorismo sa buong daigdig samantalang higit sa terorista ang agresibo nitong pagpapakat ng mga tropang militar ng US saanmang panig ng mundo na makaisang-panig nilang tinutukoy na may mga “terorista”, tulad ng ginagawa nila sa bansa.

Tanda ng mas pagpabor ng naghaharing paksyong Bush sa ganitong hakbangin, naglaan na ng \$27.2 bilyon na badyet para sa gera ang US sa susunod na taong 2003. Balak din nitong gumastos ng \$408 bilyon para sa malakihang produksyon ng armas at iba pang kagamitang pandigma sa susunod na limang taon.

Ito ang desperadong paraang isinusulong ngayon ng US upang muling pasiglahin ang pumapalya nitong ekonomya.

ANG PAGLABAN NG SAMBAYANANG PILIPINO

Anupaman ang maging katawagan nito, malinaw sa mamamayang Pilipino na ito’y isang armadong panghihimasok.

At kahit na anupamang pangangatwiran ang ipalaganap ng rehimeng Macapagal-Arroyo at ng amo nitong US, hindi maipagkakailang ang pagsupil at pagdurog sa diwang makabayan, pakikibakang masa at kilusang masa, at rebolusyonaryong kilusan ang misyon ng pagsasanay-militar nila sa bansa.

Ilan sa mga kagawad nito ay direkta nang sumasama sa mga operasyong militar sa Gitnang Luzon at sa Cavite sa Timog Katagalugan.

Desperado ring inilulunsad ng sabwatang Sentral na Ahensyang Paniktik ng US (CIA) at militaristang reaksyunaryong rehimeng Macapagal-Arroyo ang mga maruruming taktika ng paninira at pang-iintriga laban sa malinis at marangal na pangalan ng rebolusyonaryong kilusan upang ipinturang terorista at maging target ng agresyong militar.

Garapalan din silang nagpapakana ng mga kaguluhan upang magmukhang katanggap-tanggap ang pagpakat ng mga tropang Amerikano sa iba pang panig ng bansa.



Ngunit hindi nito mapipigilan ang mabilis na pagtaas ng kamulatang makabayan at diwang mapanlaban ng mamamayang Pilipino.

Tanda nito ang masisigla, malakihan, at hiwa-hiwalay pero sentralisadong pagtuligsa ng sambayanan sa imbing hakbanging ito ng imperyalismong US at papet nitong gobyerno. Halos araw-araw ay pumupula ang lansangan na tahasang nagpapakita ng pagtutol sa panghihimasok ng mga tropang Amerikano sa bansa. Nitong Pebrero 4 lamang, inilunsad ng libu-libong mamamayan sa buong bansa ang isang pambansang araw ng protesta laban sa Balikatan.

Anumang pagkapikon ni Gloria sa mga pagkilos na ito at anupamang panawagan nitong tumigil na ang mga mamamayan sa pagsama sa mga kilos protestang laban sa Balikatan, ay hindi makapagpapahinto sa malakihan at malawakang paglaban ng sambayanan.

Lumalawak ang lunsaran ng pakikibaka ng mamamayan. Kasabay nito umiigting ang armadong pakikibaka sa mga kanayunan.


S

Paglabag sa mga Napagkasunduang Prinsipyo ng Usapang Pangkapayapaan

Malinaw sa pinirmahang The Hague Joint Declaration ng Gubyerno ng Republika ng Pilipinas (GRP) at ng Pambansa Demokratikong Prente ng Pilipinas (NDFP) na kumakatawan sa rebolusyonaryong kilusan, ang balangkas ng mga katanggap-tanggap na prinsipyong gumagabay sa usapang pangkapayapaan kung saan kabilang ang pangangalaga sa pambansang soberanya ng Pilipinas, bilang esensyal na usapin sa pagsulong ng negosasyon sa pagitan ng dalawang panig.

Ang pagpapahintulot ng reaksyunaryong GRP sa pagdagsa ng mga tropang militar ng US sa ating bansa na ikinukubli nito bilang mga "pagsasanay militar" at "pakikidigma laban sa terorismo" ay isang tahasang pang-aalipusta sa soberanya ng ating bansa at malinaw na paglabag sa mga napagkasunduan.

Ang ganitong mga hakbangin ng GRP ay nagpapakita sa kawalan nito ng kaseryosohan sa usapang pangkapayapaan at kung gayun ay pagsasawalang-



bahala nito sa iba pang mga mayor na adyendang dapat pag-usapan katulad ng mga sosyo-ekonomikong reporma. Mas pinapaburan ng rehimeng US-Macapagal-Arroyo ang mga militaristang hakbangin ni Hen. Angelo Reyes na siyang sagadsaring nagmamaniobra upang ipawalang-saysay ang mga napagkasunduan ng GRP at NDFP panel at tuluyang itigil ang usapan. Maliban pa dito, kapansin-pansing pinagkakasya na lamang ng GRP sa mga impormal na daluyan (backdoor channels) ang mga pag-uusap.

Palabas lamang ang pagpirma sa Mutual Logistics and Support Agreement (MLSA) ng Punong Hen. ng AFP na si Diomedio Villanueva at ng Punong Admiral ng US Pacific Command na si Dennis Blair kung saan pinapahintulutan ang pagpasok ng mga tropang militar

Sundan sa pahina 10

ng US at ang pagtatayo ng mga imprastruktura para sa mga pangangailangan ng mga ito. Paglapastangan ito sa p a n t e r i t o r y o n g integridad ng ating bansa. Dagdag pa, tahasang nilabag din mismo ng rehimeng US-Macapagal-Arroyo ang antinasyunalistang Visiting Forces Agreement (VFA) kung saan sinasabing hanggang isang buwan lang ang taning ng pagbisita ng mga

tropang Amerikano. Sa MLSA, pinapayagan nang tumagal mula anim na buwan hanggang isang taon ang mga tropang Amerikano dala-dala ang kanilang mapangwasak na mga kagamitang pandigma.

Mas nakababahala ngayon ang nagiging tunguhin ng mga "pagsasanay militar" na ito dahil may planong magsagawa ng labinlima pang katulad nito sa loob lamang ng kasalukuyang taon. At ang mga pagdadausan ay mga lugar na wala namang presensya ng teroristang Abu Sayyaf. Kaakibat nito ang sistematikong paglulubid ng mga kasinungalingan ng reaksiyunaryong rehimen kung saan ihinahanay ang rebolusyonaryong kilusan, partikular ang Bagong Hukbong Bayan (BHB) sa mga grupong terorista. Tahasan na ring ibinulgar ni Heneral Reyes na ang susunod na target ng magkasanib na operasyong militar ng AFP at ng tropang US, pagkatapos ng Abu Sayyaf, ay ang BHB at MILF.

Mas nagiging malinaw na ang tunguhin ng umaabot na sa mahigit isanlibong tropang Amerikano sa bansa ay ang pagdurog sa rebolusyonaryong kilusan at ang pagpapatindi ng imperyalistang dominasyon ng US sa bansa. Mahigpit itong kinukundena ng NDFP panel bilang manipestasyon ng imbing kalooban ng rehimeng US-Macapagal-Arroyo sa proseso ng usapang pangkapayapaan. Ilinalantad din ito ng NDFP bilang patunay na wala

Mas nagiging malinaw na ang tunguhin ng umaabot na sa mahigit isanlibong tropang Amerikano sa bansa ay ang pagdurog sa rebolusyonaryong kilusan at ang pagpapatindi ng imperyalistang dominasyon ng US sa bansa.

talagang plano ang reaksiyunaryong estado na solusyunan ang mga batayang problema ng mamamayang Pilipino na siyang layunin ng usapang pangkapayapaan.

Malaon nang talamak ang rekord ng GRP sa pagsabotahe at paglapastangan ng mga usapang pangkapayapaan. Tampok dito ang pagbale-wala sa napirmahang Komprehensibong Kasunduan sa Paggalang sa Karapatang Pantao at Internasyunal na Makataong Batas (CARHRIHL). Maaalala ring makaisang-panig nitong sinuspindi ang negosasyon nang parusahan ng BHB noong Agosto 2001 si Col Rodolfo Aguinaldo na isang pasista at kilalang tortyurer at patuloy na kinakandili ng estado. Sinuspindi rin nito ang nakatakdang muling pagbubukas ng usapan noong Disyembre 10-14, 2001 at nitong Enero 7. Nagmamaniobra rin itong baguhin ang ilang mahahalagang napagkaisahan sa The Hague Joint Declaration ng 1992, tulad ng hakbang-hakbang at masinop na proseso ng pagtalakay at pagreresolba ng mga saligang usapin.

Sa ganitong sitwasyon, mas matindi ang pangangailangang kumilos ang buong sambayanan upang tutulan, ikundena at labanan ang panunumbalik ng mga tropang Amerikano. Bahagi ito ng puspusang pagsusulong ng digmang bayan bilang tanging solusyon sa kahirapan at kaapihan ng mamamayang Pilipino sa ilalim ng imperyalismo, burukrata-kapitalismo at pyudalismo.

S

Sa Tagumpay ng Pagpapabagsak ng mga Nagharing Rehimen: Higit na Magpunyagi sa Pakikibaka upang Ganap na Maibagsak ang Buong Naghaharing Sistema



Buhay na buhay at punung-puno ng sigla ang malawakang pagkilos ng sambayanan sa larangan ng parlamentaryong pakikibaka. Mapagpasyang ginawang lunsaran ng militanteng paglaban ng mamamayan ang lahat ng mga mayor na kalsada sa bansa. Pinalamutian ito ng mga plakard at estrimer na tumutuligsa, pumupuna at nananawagan ng pangkalahatang pagbabago sa kairalang malapyudal at malakolonyal. Kinulayan ito ng pulang pintura, damit at bandilang sumasagisag sa hindi kumukupas na paglaban. At pinagliyab ito ng kolektibong pagmamahal sa bayan, galit sa sistemang panlipunan at paninindigang isulong ang kilusan para sa pambansang demokrasya at kalayaan.

MAKIBAKA, HUWAG MATAKOT!

Isinigaw sa mga pangunahing kalye at plasa ng Kamaynilaan ang mga katagang magiging pamilyar na panawagan ng pagprotesta, pagtuligsa at paglaban sa naghaharing pangkating pasistang US-Marcos.

Noong Marso 14, 1961, pinangunahan ng Students Cultural Alliance of UP (SCAUP) ang 4,000 mga kabataang-estudyante sa demonstrasyong inilunsad laban sa Committee on Anti-Filipino Activities

(CAFA). Ang pagkilos na ito ay sinundan ng marami pang demonstrasyon hanggang huling bahagi ng dekada '60. Sa panahong ito, mabilis na umunlad ang kilusang welga, boykot at protesta. Naging mahigpit na kakabit ng mga pagkilos na ito ang linyang anti-imperyalista, anti-pyudal at anti-burukrata-kapitalistang paglaban.

Sa dekadang ito naitatag ang Kabataang Makabayan (KM-1964), muling naitatag ang Partido Komunista ng Pilipinas (PKP-MLKMZ-1968) at naitayo sa kanayunan ng Tarlac ang Bagong Hukbong Bayan (BHB-1969). Ang mga rebolusyonaryong kaganapang ito ang siyang nakapagpabilis sa pagtaas ng mga panawagan at linyang dala-dala ng mga kilusang masang mabilis na lumaganap sa buong kapuluan.

Sa harap ng matinding pasismong ipinanghataw ng rehimen ng US-Marcos, isinigaw ng taumbayan ang pinakamataas na panawagang pagsilbihan ang sambayanan, makisalamuha sa masang anakpawis, tumungo sa mga kanayunan at isulong ang digmang bayan na may sosyalistang perspektiba.

Noong ika-30 hanggang katapusan ng Enero 1970, limampung libo hanggang isandaang libong mamamayan ang nagmartsa sa mga mayor na

Sundan sa pahina 12

SIGWA NG UNANG KUWARTO:

kalsada ng Kamaynilaan hanggang sa Kongreso at harapan ng Malakanyang upang iprotesta ang labis na krisis na likha ng malakolonyal at malapyudal na sistemang umiiral.

Ang pangyayaring ito ang unang pagkilos sa balisang panahong mas makikilalang Sigwa ng Unang Kwarto (FQS) ng dekada '70.

ANG TAO, ANG BAYAN, NGAYON AY LUMALABAN!

Sa ilang papet na rehimeng dumaan matapos mapatalsik sa Malakanyang ang diktadurang US-Marcos, hindi man lamang namanglaw ang mga pamana ng FQS. Lubusang pinagyaman ng masa ng sambayanan ang kalsada bilang isang malawak na larangan ng labanan. Dito puspusing isinulong ang kolektibong pakikibakang tutungo sa mga makasaysayang tagumpay na EDSA I at EDSA II.

Dito rin nakamit ang mga sektoral na tagumpay na magsisilbing mahusay na pambukas sa pag-abot, pagmumulat, pag-oorganisa at pagpapakilos sa mga masa.

Masiglang ginawang malawak na paaralan ang mga lansangan. Ang mga edukasyong masang nailunsad dito ay mabilis na kumalat sa mga komunidad, pabrika at paaralan. Tuluy-tuloy ring naipahalubilo sa mga anakpawis ang mga intelektwal at propesyunal.

Maraming sigwa pa ang sumunod sa FQS. Tampok ang naging pagkilos ng mamamayan laban sa diktadurang US-Marcos, mga base militar, sa Asia Pacific Economic Cooperation (APEC), mababang sahod, at sa Visiting Forces Agreement (VFA). Nailunsad din ang mga pambansang paralisasyon ng transportasyon laban sa pagtaas ng presyo ng langis at kilusang boykot ng mga kabataang estudyante laban naman sa komersyalisasyon ng edukasyon.

Sa bawat rebolusyonaryong daluyong ay hindi karaniwang bilang ng mga welga ang ambag ng kilusang manggagawa sa paglaban.

SOBRA NANG PAHIRAP, PATALSIKIN SI ERAP!

Ang mapagpasyang pagpapatalsik kay Erap ang pinakahuli sa mga pinakamalalaking tagumpay na nakamit sa pamamagitan ng militanteng sama-samang pagkilos sa lansangan.

Ipinakita ng pagkilos na ito ang antas ng pag-unlad ng parlamentaryong pakikibaka. Nabuo at pinamunuan ng sambayanan sa labang ito ang pinakamalawak na alyansang anti-Erap. At nagawang mapatampok ang militante at organisadong paglaban sa mga lansangan.

Kaiba sa kampanyang pagpapatalsik kay Marcos (naging EDSA I), ganap na naihiwalay ng mamamayan ang mga bagong reaksiyunaryong naghaharing paksyon matapos mapalayas si Erap sa Malakanyang. Ang malawak na masa ng lumalabang sambayanan ay nasa paligid ng palasyo, samantalang sa EDSA Shrine naman nagkumpol ang mga reaksiyunaryo.

TIBAYAN ANG HANAY, GAPIIN ANG KAAWAY!

Maraming rebolusyonaryong pwersa ang iniluluwal ng parlamentaryong pakikibaka. Daang libong organisadong mga indibidwal ang mahusay na kumikilos ngayon at



Sundan sa pahina 13

Sa ika-33 Anibersaryo ng Bagong Hukbong Bayan

HANDA ANG HUKBO NG SAMBAYANAN SA PAGLABAN SA AGRESYONG US AT SA PAGPUPUNYAGI SA DIGMANG BAYAN



Ang tinutungo ng tinatamasang mga tagumpay ngayon ng Bagong Hukbong Bayan (BHB) sa pulitika, militar, at organisasyon, ay ang pagpapaigting at pagsulong ng digmang bayan. Kaalinsabay din ang pagharap sa lumulubhang kontra-rebolusyonaryong dahas at panunupil ng rehimeng Macapagal-Arroyo batay sa dikta ng amo nitong imperyalistang US.

Ipagbunyi ang mga tagumpay ng Bagong Hukbong Bayan.

Taglay ang mga aral ng Ikalawang Dakilang Kilusang Pagwawasto, nasa pinakamaunlad na katayuan ngayon ang

Sundan sa pahina 14

SIGWA NG UNANG KUWARTO:

tumutuligsa sa reaksyunaryong estado.

Nag-ambag ang KM ng maraming aktibista mula sa hanay ng kabataan, estudyante, propesyunal at intelektwal, kasabay ng mga manggagawa at magsasaka na naging mahuhusay na kadre at mandirigma ng BHB. Kanilang isinabuhay ang diwa ng FQS, nag-ambag ng kanilang talino at lakas sa pagsusulong ng matagalang digmang bayan. May mga nag-alay na rin ng buhay at naging martir sa pakikibaka.

At sa harap ng nagbabantang armadong agresyong US, susulong pa ang diwa ng FQS: mag-propaganda, magmulat, mag-organisa at magpakilos ng pinakamalawak na masa, at magsilbing masiglang bukal ng mga kadre at mandirigma ng Partido Komunista ng Pilipinas (PKP-MLM) at Bagong Hukbong Bayan (BHB).

Kailangang isulong ang pakikibakang masa laban sa digmang agresyon ng US, at

gawin itong tuntungan sa pagpapataksik sa rehimeng US-Macapagal-Arroyo.

Itinuturo ng kasaysayan na kayang ipagtagumpay ang pagpapabagsak ng mga rehimen sa pamamagitan ng sama-samang pagkilos. Higit na kailangang magpunyagi sa pakikibaka ang buong mamamayan upang maibagsak ang buong naghaharing sistemang malapyudal at malakolonyal. Kaalinsabay ng pagsulong at paglawak ng pakikibakang masa sa mga lunsod, umiigting ang armadong pakikibaka sa mga kanayunan.

Ang parlamentaryong pakikibaka sa kalunsuran ay nagsisilbing balon ng makapangyarihang lakas para sa lahatang panig na pagsusulong ng matagalang digmang bayan.

At sabay-sabay na sisigaw ang sambayanan, **ISULONG ANG DEMOKRATIKONG REBOLUSYONG BAYAN! ISULONG ANG MATAGALANG DIGMANG BAYAN!**

S

SA IKA-33 ANIBERSARYO NG BAGONG HUKBONG BAYAN:

BHB sa pagtataguyod ng rebolusyonaryong teorya ng Marxismo-Leninismo-Maoismo. At sa gayong reoryentasyon at sa patuloy na pamumuno ng Partido Komunista ng Pilipinas (PKP), ibayong nakapag-panibagong sigla at nakapag-panibagong lakas ang BHB sa pagsusulong ng armadong pakikibaka, pagtatayo ng mga baseng masa, at pagpapatupad ng rebolusyong agraryo.

Dumadagundong na tagumpay ang paglaki ng hukbo ng bayan. Umaabot na ngayon sa libu-libo ang kabuuang bilang ng mga pulang mandirigma, na katumbas na ng ilang rehimiyento o brigada. Libu-libo rin ang matataas na kalibreng riple na nakasasapat sa bilang ng mga mandirigma. Partikular sa Bikol, taun-taon din ang paglaki ng bilang ng mga kadre at mandirigma, at sa nagdaang taon ay nakapaglunsad ang BHB sa rehiyon ng matatagumpay na aksyong militar sa lahat ng probinsya. Ang mga opensibang ito ay nakapagpalitaw ng maraming malalakas na armas, kabilang na ang ilang machine gun at grenade launcher, mga maiikling baril, at mga kagamitang militar.

Ang mga nasamsam na armas at kagamitang militar ay iniarmas sa mga karagdagang binuong yunit at sa pagpapalakas ng iba pang yunit sa gawaing masa, yunit sa serbisyo, at mga yunit gerilya. Ang mga yunit na ito ay nakalatag at nakalubog sa ibayong lumalawak at lumalalim na baseng masang nilalanguyan ng mga pulang mandirigma. Naaabot na ang mga tabing-haywey, tabing-dagat, kapatagan, gilid ng mga sentrong bayan, at ang mga pangunahing daluyan ng transportasyon at komunikasyon.

Bahagi lamang ito ng kabuuang bilang ng 128 larangang gerilya na kinikilusan ng BHB sa buong bansa, na sumasaklaw sa 823 o 54 porsyento ng mga bayan at lunsod, at 8,500 o 18 porsyento ng mga baranggay.

Pinangungunahan ng BHB ang pagmumulat, pag-oorganisa, at pagpapakilos sa mga magsasaka upang isulong ang pagsasakatuparan ng mga layunin ng rebolusyong agraryo. Ang sinasaklaw ng matagumpay na rebolusyong agraryo sa rehiyon ay umabot na sa mahigit dalawampung libong (20,000+) ektarya at umiiral na dito ang partihang 2/3-1/3, 60-40, at 50-50 sa mga niyugan, at 90-10 naman sa mga palayan at maisan, pabor sa mga magsasaka.

Kabilang sa iba pang kampanya ng BHB ay ang mga kampanya sa edukasyong masa, pagpapaunlad sa produksyon sa agrikultura at karagdagang hanapbuhay, pangangalaga sa kalusugan ng mamamayan, pagsusulong ng mga pangkulturang aktibidad, pagsasanay sa milisya at sa yunit sa pananggol-sa-sarili, paglutas sa mga alitan sa hanay ng masa, at iba pa.

Minamahal at kinakalinga ng mamamayan ang BHB dahil isinusulong ng mga kadre at mandirigma nila ang kanilang pambansa at demokratikong karapatan at interes at ipinaglalaman ang rebolusyonaryong adhikain laban sa imperyalismong US at lokal na mga mapagsamantalang uri. At habang lumulubha ang mga kalagayan ng pagsasamantala at pang-aapi, lalo lamang darami ang aping mamamayan na mag-aarmas, at lalo lamang tataas ang rebolusyonaryong lakas at prestihiyo ng BHB habang sumusulong ang lahat ng anyo ng rebolusyonaryong pakikibaka.


Maghanda sa agresyong US at magpunyagi sa digmang bayan

Ang malubhang krisis na kinasasadlakan ngayon ng pandaigdigang sistemang kapitalista, na kinatatampukan ng krisis ng imperyalismong US, ay nagbubunsod ng pagkalugmok din sa mas malubha pang krisis ng lokal na naghaharing sistema. Sa

Sundan sa pahina 15

Kampanya sa Pagpapataas ng Presyo ng Kopra at Pag-alis ng Resikada Ilang Tagumpay Nakamit

"Gusto ming maibalik sa tunay na paraniniyog an P130 bilyong coco levy."



Ito ang pahayag ng ilanlibong nagpiket na magniniyog mula sa iba't ibang bayan ng Camarines Sur sa harap ng komprada ni CoSay noong Marso 18. Pinangunahan ito ng Kalipunan ng Paraniniyog para sa Repormang Agraryo (KOPRA), at ng Bicol Coconut Planters Association, Inc. (BCPAI). Nakamit ang panimulang tagumpay sa pagpapataas ng presyo ng kopra, naging P11 ang presyo ng bawat kilo mula sa dating P7, at tinanggal din ang limang porsyentong resiko sa bawat 100 kilong pinatitimbang na kopra sa komprada ni CoSay matapos ang dayalog. Gayundin, may dagdag na 50 sentimos sa bawat kilo ng kopra at palay na ibebenta dito ng mga kasapi ng KOPRA at BICPAI. Ipinaayos pa ang lahat ng timbangan sa nabanggit na komprada.

Sundan sa pahina 16

SA IKA-33 ANIBERSARYO NG BAGONG HUKBONG BAYAN:

desperasyon ng US na mapanatili at mapalawig pa ang pangangamkam ng yaman at pagsasamantala sa lakas-paggawa ng Pilipinas, tahasan na itong nanghihimasok sa bansa sa pamamagitan ng pagdagsa ng kanyang mga tropang militar, sa tulong na rin ng pagmamaniobra at pakikipagsabwatan ng papet nitong rehimeng Macapagal-Arroyo.

Ang nagkukunwaring mga "pagsasanay militar" at "pandaigdigang digma laban sa terorismo", na pilit isinasalaksak sa mamamayan, ay paghahanda sa digmang agresyon ng US sa desperadong pagtatangka nitong supilin ang dumadaluyong at lumalawak na rebolusyonaryong pagkilos ng mamamayan laban sa lumalalang pagsasamantala at

pang-aapi ng imperyalismo at lokal na kontra-rebolusyon.

Ngunit ang armadong agresyon ng US ay handang harapin ng Partido, BHB, NDFP, ng MILF at ng mamamayan. Hindi tayo kayang sindakin ng banta ng digmang agresyon ng US at papet nitong AFP. Bagkus ay magagawang bigwasan ng sambayanan ng pamatay na dagok ang pananalakay ng US at ang lokal na naghaharing sistema.

Ang BHB ang kasangkapan ng mamamayan sa pagsulong ng digma ng pambansang pagpapalaya sa saklot ng imperyalismong US. Titiyakin ng mahigpit na pagkapit sa rebolusyonaryong teorya at pagpupunyagi sa estratehikong linya ng matagalang digmang bayan ang pananaig ng BHB sa pananalakay ng US.

S

KAMPANYA SA PAGPAPATAAS NG PRESYO NG KOPRA...

Nauna nang nagpiket ang mga magniniyog mula sa mga bayan ng Pasacao, Libmanan at Sipocot sa harap ng komprada ni Oliven. Hindi sila hinarap ni Oliven, nagpatawag ito ng pulis at pinaalis ang mga nagpiket. Tumuloy sa plaza ng Pasacao ang mga magniniyog at doon ipinahayag ang kanilang mga hinaing at panawagan. Sina CoSay at Oliven ang mayor na kumukontrol sa pitong oil mill sa rehiyon at sa lima pang kumpanyang gumagawa ng mga produkto mula sa bunot ng niyog.

Kaugnay nito, naglunsad ng isang kilos protesta sa harap ng upisina ng San Miguel Corporation (SMC) sa Pasig City ang isandaang magniniyog, 20 dito ang mula sa Bikol, noong Pebrero 27. Pinangunahan ito ng Kilusang Magbubukid ng Pilipinas (KMP), ng Pinag-isang Lakas ng Magbubukid sa Quezon (Piglas-Quezon), at ng BCPAI.

Nilalabanan din ng KMP, PIGLAS, at BCPAI ang pagpirma sa \$40 milyong pakikipag-areglo sa pagitan ng SMC at kumpanyang Kirin, isang dambuhalang kumpanya ng beer sa Japan. Pinanawagan din nila ang pagpapataalsik kay Danding Cojuangco bilang pinuno ng SMC.

Maaalalang noong Agosto 1982 ay matagumpay na napahinto ang pagkikil ng coco levy mula sa mga magniniyog dahil sa serye ng mga protesta na pinangunahan ng BCPAI, mula nang itayo ito noong 1980, kasabay ang iba pang mga organisasyon ng magniniyog sa buong bansa. Nangyari ito matapos ang halos isang dekadang bwelong panginigkil sa magniniyog ng rehimeng Marcos noong 1973 hanggang 1982.

Malaon nang ninanais ng maliliit na magniniyog na mabawi ang P130 bilyong pondong coco levy mula sa mga Cojuangco at kasapakat nito tulad nina Enrile at Lobregat. Ninanais ng mga magniniyog na maitayo na ang Komite ng Tunay na Maliliit na Magniniyog (Genuine Small Coconut

Farmers Committee) na siyang dapat mangasiwa sa nabanggit na pondo.

Ang coco levy ay pwersahang kinulekta sa mga magniniyog noong panahon ni Marcos. Ginamit ni Cojuangco ang United Coconut Planters Bank (UCPB) at pondong coco levy sa pagbili ng sapi sa SMC. Mula sa perang ito ay naitayo ang United Coconut Oil Mills (UNICOM) at lumago ang negosyo ni Cojuangco sa iba't ibang larangan sa pangunguna ng SMC.

Ngunit sa halip na ibalik ni Macapagal-Arroyo sa mga magniniyog ang pondong coco levy, mas pinalakas nito ang monopolyo at kontrol dito ni Cojuangco.

Hinirang pa ni Macapagal-Arroyo si Conrado "Dodie" Limcaoco, bilang presidential assistant dahil sa susing papel nito sa lantarang pakikipag-areglo kay Cojuangco. Pangunahing tungkulin ni Limcaoco na "buksan sa lalong madaling panahon ang 16-taong natipong pondo ng coco levy". Bulgarang inaareglo nila ngayon ang mga paraan para maibigay na kay Cojuangco ang lubos na pag-aari sa SMC.

Nagkakandarapa si Macapagal-Arroyo sa pakikipag-areglo kay Cojuangco upang masiguro ang pampulitikang suporta at malaking pinansyal na kontribusyon nito para sa eleksiyong 2004.

IBALIK ANG P130 BILYONG PONDONG COCO LEVY SA MALILIIT NA MAGNINIYOG!

ITAYO ANG KOMITE NG TUNAY NA MALILIIT NA MAGNINIYOG!

ALISIN ANG RESIKO AT IBA PANG ANYO NG PANDARAYA!

KAGYAT NA ITAAS ANG PRESYO NG KOPRA SA HALAGANG P20 KATUMBAS NG PRESYO NG BIGAS!

IPAGLABAN ANG TUNAY NA REPORMA SA LUPA!

S

**RJC Tinuligsa ang mga
Paninira ng AFP sa BHB**

Tinuligsa ng Romulo Jallores Command (RJC) ang mga kasinungalingan ng reaksyunaryong Hukbong Sandatahan ng Pilipinas (AFP) hinggil sa pang-iintriga at paninira sa pangalan ng Bagong Hukbong Bayan (BHB).

Ayon kay Kasamang Jose Buenaobra, tagapagsalita ng RJC, bahagi ito ng itim na propagandang ikinakasa ng Southern Luzon Command (SOLCOM) ng AFP laban sa BHB. Layunin nitong pinturahang "terorista" ang BHB upang bigyang-matwid ang lansakang militarisasyon at ikundisyon ang isipan ng mamamayan sa pagtindi ng armadong panghihimasok at agresyon ng mga tropang Amerikano laban sa mamamayang Pilipino at sa rebolusyonaryong kilusan.

Ayon pa sa RJC, ang paglakas ng grupong vigilante na naghahasik ng lagim at takot sa mga mamamayan ng Camarines Sur ay pakana mismo ng AFP. Sa mga grupong ito mabilis na nakilala sa karahasan at kasamaan ang Bonnet Gang sa mga bayan ng Calabanga, Siruma at Tinambac na pilit na iniuugnay ng AFP at PNP sa BHB.

Binira din ng RJC ang walang katotohanang pagsangkot sa mga pulang mandirigma sa naganap na Siruma masaker. Mismong ang asawa ng isa sa

mga biktima ang nagpahayag na hindi mga BHB, kundi nagpakilalang mga pulis Tinambac ang mga salarin.


Isang malaking kasinungalingan din, ayon pa sa RJC, ang diumano'y pagkidnap sa mga empleyado ng First Catanduanes Electric Cooperative (FICELCO). Pakana ito ng AFP para siraan ang BHB at pagtakpan ang bigong operasyong militar nito sa isla noong Pebrero.

Nilantad din ng RJC ang deklarasyon ng AFP na diumano'y nalusaw ang batalyong pormasyon ng BHB dahil sa pagkakahuli sa dalawang kasapi raw ng BHB sa Camalig, Albay.

"Sobrang hambog at panloloko sa sarili, ang ipinangalandakan ni Hen. Ernesto Carolina at ni Hen. Jacinto Ligot ng Philippine Army 2nd Infantry Division, na pagkakahuli kay Nestor Paloyo o Ka Neo at sa kanyang asawa, na diumano'y matataas na lider ng PKP at BHB sa rehiyon. Sa katunayan, matagal na silang namumuhay bilang karaniwang sibilyan," panapos ni Ka Jose.

S**INTEL PINARUSAHAN**


Inambus at napatay ng isang tim ng BHB ang masugid na intel na si Lupo Regorosa Ola noong Enero 9, 2002 sa Brgy. Lumacao, Guinobatan, Albay. Ayon sa Santos-Binamera Command, si Ola ay civilian agent ng 22nd IB PA na may kasong pagrekluta ng mga impormer sa mga barangay ng Guinobatan, gayundin ng pagtanim ng mga operatiba ng mga civilian agent sa naturang bayan. Pangunahing sangkot din si Ola sa pagkakakubkob sa mga BHB sa Guinobatan noong Hunyo 2001.

**S****INISPARO MAGKAPATID NA INTEL**


Inisparo sina MSgt Joir Guime at Roberto Guime, mga aktibong intell ng Philippine Army sa barangay Bonifacio, Bulan, Sorsogon noong Enero 12. Nakumpiska sa mga ito ang isang kalibre .45

Kasunod nito, inisparo din si Sgt. Panti, isang intelligence officer ng Charlie Coy. ng 2nd IB, PA noong Enero 27 sa bayan ng Irosin, Sorsogon. Nasamsam naman mula sa kanya ang isang kalibre .45

S



KLINIKANG BAYAN NG BHB, PINURI ng MASA



Catanduanes—Higit sa dalawang libong Catandunganon ang nabigyan ng serbisyong medikal at dental ng mga pulang mandirigma sa isang buwang kampanyang Klinikang Bayan noong Enero.

Ang mga pulang mandirigma ay nakapagbigay ng serbisyong dental, minor na operasyon, pagtutuli, akyupangtura, tsek-ap at mga gamot. May 75 nagpabunot ng ngipin, 25 naoperahan ng cysts, 150 nagpatuli, higit sa 500 nagpa-akyupangtura, at maraming nagpa tsek-ap at nabigyan ng gamot.

Isinagawa ang kampanyang Klinikang Bayan sa limang bayan ng Catanduanes matapos ang isang matagumpay na treyning medikal ng 15 bagong doktor, ilan dito ay mula sa lokalidad. Dagdag pa dito, marami ang naturuan sa paggamit at pagproseso ng mga herbal na gamot.

Labis ang kagalakan ng mamamayan

sa 18 baryong nalunsaran ng kampanyang ito. Daan-daan ang namobilisa upang maging matagumpay ang mga klinikang bayan. Bahagi din ng pagsusulong ng pang araw-araw na gawain ng yunit ng hukbo ang pagbibigay ng serbisyong medikal.

Samantala, bigong nagsagawa ng operasyong militar ang pinag-isang tropa ng 22nd at 2nd Infantry Battalion ng Philippine Army at ng Regional Mobile Group ng Philippine National Police bilang reaksiyon sa nabanggit na kampanya ng hukbo. Sinaklaw ng operasyong militar ang mga bayan ng Virac, Pandan, Caramoran, San Andres at Bagamanoc. Pinaghahanap ng nabanggit na mga militar at pulis ang mga mandirigmang doktor.

S

NIREYD MGA BAHAY NG CAFGU

Nireyd ng mga pulang mandirigma noong Enero 22 ang bahay ng pusakal na CAFGU na si Dexter Sambajon. Napatay si Sambajon sa barangay Kalsada, na nasa poblasyon ng bayan ng Jovellar, Albay.

Pusakal na holdaper si Sambajon sa iba't ibang barangay ng Jovellar mula pa noong 1990. Masugid na giya siya ng mga operasyong militar sa Jovellar. Isang maiksing armas ang nasamsam mula sa kanya.

Sa kaugnay na balita, nireyd ang bahay ng isa pang CAFGU sa Brgy. Badbad, Oas. Napatay ang masugid na giya ng 22nd IB PA sa mga operasyong militar sa bayan ng Oas, Albay. Pinarusahan din ang abusadong CAFGU na si Paredes Matsa sa

Guinobatan, Albay.


S

ABUSADONG PULIS INISPARO

Inisparo ang isang pusakal na mamamatay-tao at upisyal ng PNP Daraga na si SPO2 Domingo Mabini. Matagumpay na naisagawa ng mga pulang mandirigma ang pagpaparusa kay Mabini noong Enero 17, ilang metro lang ang layo mula sa istasyon ng PNP sa bayan ng Daraga. Mayroon ding nasamsam na maiksing armas at ilang mahahalagang impormasyong pang-intel mula kay Mabini.

Napatunayang nagkasala si Mabini sa pagsalbeyds ng tatlong sibilyan, at gayundin sa pagrekluta at paglalata ng mga civilian intel sa Daraga, Albay.

S



Limang Mandirigma, Ni-reyd ang Kababayan Center

Pio Duran, Albay – Bandang alas-9:30 ng gabi isinagawa ng limang magigiting na Pulang mandirigma ang reyd sa Kababayan Center (KC) noong Pebrero 16.

Maingat at madaling nakalapit ang mga Pulang mandirigma sa target dahil matao ang lugar, may amateur singing contest.

Pero bago pa napasok ang KC, naagaw na nang walang putok ang isang M16 armalayt mula sa isang pulis.

Pahiga-higa ang nabanggit na pulis sa ibabaw ng isang sasakyang Mitsubishi habang nanonood ng amateur contest nang maagawan ng armalayt ng mga Pulang mandirigma. Napasuko agad ito, kasabay ang isang pulis.

Sa saliw ng kantang "Dakilang Lahi," pinasok ng mga mandirigma ang KC, kasabay ang dalawang pulis na napasuko.


Nagkaroon ng putukan nang manlaban ang tatlong pulis sa loob ng KC. Matapos ang halos sampung minutong labanan, nakontrol ang KC.

Nasamsam ng mga Pulang

mandirigma ang dalawang M16 armalayt. Tatlong elemento ng PNP ang namatay sa labanang iyon, sina SPO4 Marciano Odeña, SPO4 Alfredo Lopez at SPO1 Sancho Sueso. Sugatan din si PO2 Emmanuel Macandog.

Ligtas at mabilis na naka-atras ang limang Pulang mandirigma.

S




"Tulog na siya. Malamang napagod sa maghapon naming paglalaro."

Marahang hinaplos ni Karen ang mala-anghel na mukha ng batang babae. Pagkuwa'y hinalikan niya sa noo at nahiga sa tabi nito.

Malalim na ang gabi subalit hindi pa rin siya natutulog. Pilit niyang nilalabanan ang antok at pagod 'pagkat bawat sandali ay mahalaga. Ginintuan ang bawat minutong kapiling niya si Ninay. Punong-puno ito ng makukulay na alaalang umuukit sa kanyang puso't isipan.

"Sana'y ganito tayo araw-araw anak...magkasama," bulong niya sa apat na taong gulang na bata. "Sana'y di na magwakas ang ganitong mga tagpo."



Karen, Rebolusyonaryong Ina

Labing walong taong gulang noon si Karen nang magpaalam siya sa kanyang mga magulang.

"Wag mo kaming iwan anak, kailangan ka namin," pakiusap ni Aling Ester. "Sino pa ang mag-aasikaso dito? Alam mo namang hindi na kami magkandaugaga ng tatay mo sa trabaho sa bukid. Ang mga kapatid mo, walang mag-aalaga sa kanila."

"Anak, hindi namin makakaya kung wala ka. Ramdam mo ang kahirapan natin. Nakikita mo naman siguro ang kalagayan ng kabuhayan natin," dagdag pa ni Aling Ester. "Kung mahal mo pa kami anak ay dumito ka na lang."

"Mahal na mahal ko po kayo. Kaya nga po ako pupunta doon para po sainyo, para

po sa ating lahat," sagot ni Karen.

Huminga ng malalim si Mang Berto, pagkuwa'y tinitigan ng matagal si Karen. Saka nagsalita, "Karen, anak, pag-isipan mo ang iyong desisyon. Alam kong matalino ka. At alam ko ring alam mong hindi basta-basta ang buhay na susuungin mo."

"Matagal ko na pong pinag-isipan ito. At sa palagay ko'y ito na ang tamang panahon para gawin ko ito," paliwanag ni Karen.

Natahimik ang mag-asawa. Naiintindihan nila ang mga sinasabi ng kanilang panganay. Masakit nga lamang tanggapin ang naging desisyon nito.

"Aalis na po ako," pamamaalam ni

Diwang Rebolusyonaryo

Karen habang kinukuha ang ilang binalot na damit at gamit, "Wag ho kayong mag-alala, lagi akong susulat."

Saka tumulo ang luha ni Karen paglabas niya ng bahay. Mabigat sa kalooban pero alam niyang tama ang pupuntahan niya...

Beinte-siyete anyos na siya ngayon. Animo'y mga alitaptap sa gabi ang mga alaala ng nakalipas na siyam na taon. Wala siyang pinagsisisihan dito. Pinatatag at pinahusay siya ng kanyang mga karanasan.

"Nay..." malambing na tinig ni Ninay.

Umaga na pala. Gising na ang bata.

Niyakap niya ito ng mahigpit saka nagsalita. "Masayang-masaya ako ngayon anak at kasama kita."

"Ako rin po," gumanti ito ng yakap. "Laro uli tayo ngayon ha?"

"Baka hindi na muna ngayon anak," sagot ni Karen.

"Ay, bakit po?" malungkot na tanong ni Ninay.

"Kailangan na kasing umalis mamaya ng nanay para magtrabaho," gumagaralgal ang boses ni Karen.

"Doon po sa tinutulungan n'yong mahihirap tulad natin?"

"Oo,anak," humugot ng hininga si Karen. "Pero hindi lang sila ang tinutulungan ko kundi pati na yung mga taga-rito, yung mga batang tulad mo, at ang lahat ng mahihirap."

"Wow! Ang galing-galing talaga ng nanay ko,"

"Hindi lang kasi ang nanay ang gumagawa n'un," nakangiting paliwanag ni Karen, "marami kami, nagkakaisa at hati-hati sa trabaho."

"Pati po si Itay?"

"Siyempre," sagot ni Karen. "Hayaan mo at sa susunod ay magkasama kaming dadalaw dito. Tiyak maraming kuwento na naman 'yun sayo. Hindi kasi siya nakasama

ngayon kasi maraming gawain dun sa malayong bayan."

"Yeheey! Kain na tayo 'nay. Gutom na ako eh."

"Sige anak, tapos tulungan mo akong mag-empake ha," sabay karga sa bata.

"Opo."

"Ang aga yata ng gising ng apo ko," bati ni Aling Ester na nagbabalot ng kanin at ilang piraso ng tuyo. "Dadalhan ko ng pagkain sina Anton at tatay mo sa bukid. Hindi pa kasi kumakain ang mga 'yun," baling nito kay Karen, "kain na kayo."

"Anihan na po pala ngayon," banggit ni Karen, "kumusta na po ang pakikipag-usap ninyo kay Montero?"

"Heto, tersyong-baliktad na ang partihan. Kaya lang, mababa pa rin ang presyo ng palay kumpara sa gastos. Tapos nagdagsaan pa ang mga imported na bigas kaya lugi pa rin." Himutok ni Aling Ester. "Ang tataas pa ng mga bilingin, ng singil sa kuryente, tapos nanggugulo pa ang mga Kanong 'yan. Yung mga nasa gubyrno naman imbes kapakanan ng masa ang atupagin, ayun! Sunud-sunuran sa sinasamba nilang Kano. Kaya marami ang namumundok at lumalaban. Ang kahirapan ay mawawakasan kung tayo ay lalaban!"

Lihim na napangiti si Karen. Malaki na nga ang pinagbago ng kanilang pamilya mula ng umalis siya. Masayang-masaya siya sa pag-unlad na ito.

"Ihatid mo na lang sa bukid si Ninay mamaya, anak,"nakangiting sabi ni Aling Ester, "at aalis na ako."

"Opo," nakangiting sagot ni Karen, "salamat."

"Salamat din anak. Ipinagmamalaki namin ang iyong katapangan at katatagan...Kasamang Gina."

**REBOLUSYONARYONG PAGPUPUGAY
SA MILITANTENG KILUSAN NG
KABABAIHANG ANAKPAWIS!**

S

REBOLUSYONARYONG AWIT

Ay Nanay, Ay Tatay

Pasakalye: Am-E-Am

Am
Ay Nanay ay Tatay,
E Am
kami po mahali
Am
Alagad puso mi
E Am
pirmi man mapuli
Dm
Samong katuyuhan
E Am
iyo an paglaban
Am E
Sa pag-aprobetsar
E7 Am
kan mga dayuhan

Girumdumon nyato
satuyang pagtios
Hanapan solusyon
ikusog an buot
Mga kaluyahan
satuyang taparan
Nin pagkasararo
para sa kakus'gan

Kon may kagadanan
sa pakipaglaban
Hampangon ta iyan
na katotohanan
Nagagadan ngani
sa pakibuyungan
Dai pang orgolyo
maski kadikit man

Kaya Nanay, Tatay
kami po paaram
Nganing hampangon ta
an pakipaglaban
Laom mi padagos
kamo man matabang
Pagkalda kan satong
mga kaapihan.

BATOP

GRABE NA
TALAGA ANG
PAKIKIALAM NG
U.S. SA ATIN.
PATI DITO SA
BIKOL NA WALA
NAMANG ABU
SAYAFF AY
PAKALAT-KALAT
NA!

... MAYROON NA
RAW NA
DALAWANG
SUNDALONG
KANO ANG NASA
LALAWIGAN
NGAYON NG
SORSOGON...



SABAGAY, ITO TALAGA ANG
DISENYO NILA. ANG MAKIALAM
AT DIGMAIN ANG MGA KASAMA
GAMIT ANG MGA HAYTEK NILANG
MGA KAGAMITAN!



HAH! TINGNAN LANG NATIN
ANG GALING NG MGA KANO!
SUPORTADO YATA NAMIN ANG
MGA KASAMA, DI BA, TUNGAW?

TUNGAW!?

TUNGAW!?

NASAN NA
KAYA YUN?

TUNGAW!?

SORSOGON...



ERRUY!!
EGGUY!!
ENG KETI-
KETI!!
ENG
SEKIT!!

UMM! UMM!
ETO'NG
BAGAY
SA MGA
PAKIALAMERO!
UMM!!